


# TEZAU LITURGIC

10 IUNIE

# ACATISTUL SF. IERARH IOAN MAXIMOVICI, MITROPOLITUL TOBOLSKULUI ȘI ÎNTREGII SIBERII III



MOSCOVA, 2000



# **АКАФИСТ ИЖЕ ВО СВЯТЫХ ОТЦУ НАШЕМУ ИОАННУ МИТРОПОЛИТУ ТОБОЛЬСКОМУ И ВСЕЯ СИБИРИ ЧУДОТВОРЦУ**

## **Кондак 1**

Избранному от Бога во святителя Церкви православныя, житием Своим и трудами великими просветившему паству Черниговскую и Тобольскую, в земли Сибирстей прославленному чудотворцу, митрополиту Иоанну, восписуем похвальная. Ты же, святителю, сию похвалу от нас грешных приими и своею молитвою сердца наша благодатию Божиею согрей, да со умилением зовем ти: Радуйся, Иоанне, святителю и всея Сибири чудотворче.

## **Икос 1**

Ангелом радование был еси святителю, егда во отрочестве и юности усердно изучению молитв церковных и посещению храмов Божиих прилежал еси. Мы же воспоминающе таковое твое житие, сице с любовью восхваляем тя: Радуйся, страны Украинския прозябение. Радуйся, града Нежина чадо богоизбранное.

Радуйся, родителем твоим утешение.  
Радуйся, близким твоим назидание.  
Радуйся, под сению обители Киево-Печерския  
воспитанный.  
Радуйся, от юности святой подвижнице.  
Радуйся, образ чистоты и целомудрия явивый.  
Радуйся, горняго отечества достигнути желавый.  
Радуйся, Иоанне, святителю и всея Сибири  
чудотворче.

### **Кондак 2**

Видя яко христиане от заповедей Божиих  
отступают и делам тьмы работают ты,  
преподобне, тщательно изучал еси слово Божие  
и получив в Печерстей Лавре звание  
проповедника, сам, благодатию Божиею  
водимый, усердно поучал еси иноков и мирских  
людей по заповедям Божиим житие свое  
устроить и Богу взывати: Аллилуиа.

### **Икос 2**

Разум твой умудряя словесы Божественными,  
пребывая по Апостолу в них, ты, святителю,  
данную ти от Бога мудрость не скрывал еси в  
себе, быв наставником школы духовныя, любовь  
к слову Божию и в сердцах юношей возгревал  
еси и их же в пастыри посвящал еси,  
назидательные во славу Божию созидая своя  
творения. Восхваляюще твое великое

трудолюбие, тако воспеваем тебе:  
Радуйся, неленостный юношей учителю.  
Радуйся, словеса Божия в сердца их влагавший.  
Радуйся, яко в келейном уединении сна очима и  
веждама дремания твоима не давал еси.  
Радуйся, яко молитве и писанию творений  
твоих, нощные часы посвящал еси.  
Радуйся, яко молитве Иисусовой обучался еси.  
Радуйся, яко благодатных озарений сподобился  
еси.  
Радуйся, ангелом собеседниче.  
Радуйся, преподобных сожителю.  
Радуйся, Иоанне, святителю и всея Сибири  
чудотворче.

### **Кондак 3**

Сила благодати Божией присуща бе тебе, Святче  
Божий, и вси зряще твое подвижническое  
житие и твоим сладостным поучениям  
внимающе, радовахуся и восхваляюще Господа,  
давшаго Тебе таковыя дарования, воспеваху  
Ему: Аллилуиа.

### **Икос 3**

Имея от Господа дар благовествования, ты,  
Божий угодниче, своими назидательными  
трудами мудро опровергал еси латинския  
заблуждения и мирян в своих поучениях научал  
еси твердо уклоняться от католических

прелестей. За таковую-то мудрую борьбу твою с католическим зловерием, восхваляем тя тако: Радуйся, яко истины веры православныя разъяснял еси.

Радуйся, яко светом православия ярко светил еси.

Радуйся, святителю, яко в сердце твоём духовныя нужды чад твоих носил еси.

Радуйся, яко твоими писаньми богословскими сердца православных умилял еси.

Радуйся, яко в опровержение латинской ереси зело потрудился еси.

Радуйся, латинских ересей и обычаев нещадный обличителю.

Радуйся, яко велиим трудом о Божественном мироуправлении южнорусский край обогатил еси.

Радуйся, яко Киево-Печерскую Лавру проповедническими трудами украсил еси.

Радуйся, Иоанне, святителю и всея Сибири чудотворче.

#### **Кондак 4**

Бурю великих смущений во иноческом от юности звании претерпел еси, преподобне. Непрестанною же молитвою, постом, всенощным бодрствованием, псалтири чтением побеждал еси вся козни вражия и Господу,

даровавшему ти победу над страстями и искушениями, взывал еси: Аллилуиа.

#### **Икос 4**

Слышаще поучения твоя, читающе богоглаголивья писания твоя, такожде житие твое видяще, иноцы Лавры Печерския и вси вернии людии восхваляху тя тако:

Радуйся, изрядный проповедниче.

Радуйся, покаяния учителю.

Радуйся, мудрый обличителю людских пороков и страстей.

Радуйся, проповедниче любви Христовой.

Радуйся, к бедным и нищим любовь пробуждавый.

Радуйся, твоим нищелюбием добрый образ всем показавый.

Радуйся, верный Церкви православныя служителю.

Радуйся, христианскаго смирения добрый учителю.

Радуйся, Иоанне, святителю и всея Сибири чудотворче.

#### **Кондак 5**

О Богоугодном житии твоём слышав, и народной молве о твоём назидательном проповедничестве внимая, святитель Черниговский Феодосий восхоте тя, преподобне,

к своему архиерейскому престолу приблизити и содела тя начальником Елецкия обители и в сан архимандрита возведе, да будеши и зде, в Чернигове, добрым изъяснителем слова Божия и со всеми иноками обители усердно Господу воспевати да будеши: Аллилуиа.

### **Икос 5**

Увидевшие твое назидательное житие и твоими поучениями наслаждавшийся обитатели града Чернигова всею душею тя, святителю, возлюбиша и по блаженней кончине святителя Феодосия едиnodушно восхотеша тя преемником почившаго в Бозе святителя видети и Святейший патриарх Адриан, признавши тя достойным, содела тя, архиепископом Черниговским. Мы же прославляя Господа, соделавшаго тя ангелом Черниговския Церкви, тако тя ублажаем:

Радуйся, яко чуднаго святителя Феодосия пастырския труды продолжал еси.

Радуйся, яко в сердце твоем светлый образ сего святителя выну имел еси.

Радуйся, яко в смертной болезни твоей у того-же святителя благодатной помощи просил еси.

Радуйся, яко святитель Феодосий Своим предстательством у престола Господня от одра болезни тя возстави.

Радуйся, яко по повелению того-же святителя

Божественную Литургию в полном здравии совершил еси.

Радуйся, яко в народе веру во святость своего предшественника утвердил еси.

Радуйся, яко служение святительское достойно восприял еси.

Радуйся, яко славныя дела Господня прославлял еси.

Радуйся, Иоанне, святителю и всея Сибири чудотворче.

### **Кондак 6**

Вроповедником жизни евангельской словом и делом, явился еси, святителю, егда архиерейское служение во граде Чернигове проходил еси и вси твои духовныя чада в тебе великаго молитвенника, добраго наставника и мудраго архипастыря видеша и благодарно о тебе Господу взываху: Аллилуиа.

### **Икос 6**

Возсиял еси, святителю, в Чернигове твоими неустанными во славу Христа трудами. ибо усердно с великим умилением совершал еси службы церковныя и сими службами и поучениями твоими привлекал еси в храмы Божии молящихся множество, и сего ради от твоих чад духовных слышал еси похвалы таковыя:

Радуйся, пастырю наш добрый.  
Радуйся, учителю златословесный.  
Радуйся, яко новых храмов и иноческих  
обителей создателю.  
Радуйся, уставов церковных блюстителю.  
Радуйся, яко нерадивых пастырей и иноков  
вразумлял еси.  
Радуйся, яко о вдовах и сиротах душею болел  
еси.  
Радуйся, яко милостынею нищих обильно  
снабжал еси.  
Радуйся, яко и пастырей учительных поставлял  
еси.  
Радуйся, Иоанне, святителю и всея Сибири  
чудотворче.

### **Кондак 7**

Хотя житие свое устроить по заповедям Божиим  
ты, святителю Иоанне, Всесвятой воле  
Божественной вседушно покаялся еси и  
клевету и неправду, воздвигнутую на тя злыми  
людьми, с терпением и благодарностью к Богу  
понесл еси, и Господу, давшему тебе  
благодатный дар терпения в скорбех твоих,  
взывал еси радостно: Аллилуиа.

### **Икос 7**

Дивное послушание премудрой и всесвятой воле  
Божественной явил еси, святителю, егда

церковным священноначалием вызван был еси из благодатныя солнечныя земли Черниговския на дальний север служить Церкви Христовой в звании митрополита Тобольскаго и всея Сибири. Паства же Черниговская с велиею печалию приявши весть о твоём преселении в хладную Сибирь, разлучаяся с тобою, тако восклицаху тебе:

Радуйся, послушный Господу рабе Христов.

Радуйся, архипастырю наш возлюбленный.

Радуйся, в назидание нам твои мудрыя творения оставивый.

Радуйся, строгий иноческих обетов исполнителю.

Радуйся, детей наших воспитателю.

Радуйся, юных наставниче.

Радуйся, мужей похвало.

Радуйся, красото церковная.

Радуйся, Иоанне, святителю и всея Сибири чудотворче.

### **Кондак 8**

Странно бе видети, како ты, святителю Иоанне, в престарелых летех страну Украинскую, в ней же родился еси и до старости Господу работал еси, оставляеши и в неизвестную тебе страну Сибирскую грядеши. Ты же, святителю, видя слезы твоя паствы Черниговския, твоим бодрым духом учил еси твоих чад духовных во

всех путех жизни быти послушным воле Божией и за вся Господу воспевати: Аллилуиа.

### **Икос 8**

Весь живя в Господе, ты, святителю Иоанне, с светлым упованием на помощь Божию долгим путем к своей новой пастве прибыл еси. В Сибири же твоя паства со умилением взирая на светлый лик старца праведнаго, сретает своего новаго архипастыря восклицаниями таковыми: Радуйся, яко долготы пути к нам не убоялся еси. Радуйся, яко старческую, духовную мудрость в наш град принесл еси.

Радуйся, новый руководителю наш к небесному царствию.

Радуйся, мудрый наставниче.

Радуйся, яко на конец жития твоего к нам прибыл еси.

Радуйся, старче праведный.

Радуйся, грядый к нам во имя Господне.

Радуйся, яко мы с любовью сретаем тебе.

Радуйся, Иоанне, святителю и всея Сибири чудотворче.

### **Кондак 9**

Всякое житейское попечение отлагая ты, преподобне отче наш, и в новом твоём граде рукою твоею достигая до жилищ бедных и обиженных, утешая скорбящих, снабдевая вдов

и сирот, благотворя и нисходя радостию исполнял еси сердца неимущих, иже от благодарнаго сердца своего восклицаху Господу: Аллилуиа.

## **Икос 9**

Витийствующий язык не может обрести слов достойных к изображению твоих добрых подвигов, яже во славу Божию совершил еси, Тобольский святителю, среди твоея новыя паствы. Духовныя же чада твоя, видяще, яко ты в старческих летех духовную юность являеши, уразумеша в тебе новый сосуд благодати Божией и возсылающе благодарение Господу за дарование их стране таковаго светильника, восхваляху тебе радостно:

Радуйся, в молитве пламенный.

Радуйся, в службах Церковных Ангел во плоти.

Радуйся, смирением Христовым богатый.

Радуйся, дивный безсребренниче.

Радуйся, чистоты сердечныя хранителю.

Радуйся, миротворче чудный.

Радуйся, весей и градов Сибирских радости.

Радуйся, иноков учителю.

Радуйся, Иоанне, святителю и всея Сибири чудотворче.

## **Кондак 10**

Спасению духовных чад твоих усердно работая, ты святителю Божий, и о иных овцах, яже не от двора Церковнаго, велие попечение имел еси, добрых пастырей во тьме язычестей сидящим людем посылал еси, да и во Христа неверующие научатся воспевать песнь хвалебную Богу: Аллилуиа.

## **Икос 10**

Стеною крепкою во исповедании веры православныя был еси, всея Сибири чудотворче, и в твоих златословесных поучениях изъяснял еси пастве твоей истины единыя Христовы Апостольския Церкви и с любовью увещевал еси твоих чад духовных, да ни в малом чем отступают от веры православныя и по Церковному учению житие свое да устрояют. И сам ты, святителю, на свещнице Церковней поставленный, и в слове и в деле Свет Евангелия Христова всей твоей пастве являл еси, и та, храня веру православную и житие по вере устрояя, со умилением тако взывает тебе: Радуйся, твердый носителю православнаго исповедания.

Радуйся, усердный ревнителю благочестия.  
Радуйся, пастырю незлобивый и трудолюбивый.  
Радуйся, яко шуйца твоя не ведяще, яже творяще десница твоя.

Радуйся, данные тебе от Бога таланты усугубивый.

Радуйся, в радость Господа твоего вшедый.

Радуйся, добрыми делы твоими Отца Небеснаго прославивый.

Радуйся, благодать Духа Святаго в душе своей носивый.

Радуйся, Иоанне, святителю и всея Сибири чудотворче.

### **Кондак 11**

Пение похвальное прими от нас наш добрый пастырю и учителю. Выну в уме и сердце твоём память смертную нося, ты, святителю, непрестанно душу твою к пути невозвратному приготавлиал еси, да со светлым лицом предстанеши пред лице нелицеприятнаго Судии и Господа и со всеми Святыми сподобишися во веки воспевати Всеблагому Спасителю: Аллилуиа.

### **Икос 11**

Светло возсиял твой дивный образ, святителю Иоанне, егда Господь возва ты в Свои небесныя обители. По совершении Божественной Литургии ты, святителю, за твою трапезу призвал еси и сослуживших тебе и бедных, Сам, не вкушая пищи, усердно предлагал уготовленное. Скончавшейся же трапезе,

удалился еси во свою молитвенную келию и, подобно святителю Ростовскому Димитрию, в ту же ночь склонившись пред иконою Богоматери, предал чистую душу твою Господеви. Умиляясь таковою твоею христианскою кончиною сибирская паства твоя со слезами возопи тебе таковую прощальную песнь:

Радуйся, незабвенный пастырю наш, на пажити словес Божественных овцы твоя пасый.

Радуйся, святителю наш, христианскою кончиною твоею святость жития твоего ясно всем показавый.

Радуйся, усердный проповедниче, уста своя на земли замкнувый, да вечно ими на небеси прославляти Господа сподобивыйся.

Радуйся, великий нищелюбче, сокровища твоя Господу чрез нищих вручивый.

Радуйся, неленостный составителю трудов богословских, ныне очима твоима Святую Троицу созерцай.

Радуйся, мудрый учителю пастырей и юношей, в третьем небеси неизреченным глаголам внимаяй.

Радуйся, языки Сибири в Христову Церковь приведый, в радость Господа вшедый.

Радуйся, под покровом Богоматери все житие прошедый и благодатную кончину пред Ея образом получивый.

Радуйся, Иоанне, святителю и всея Сибири чудотворче.

### **Кондак 12**

Благодать Божию в тебе, святителю, почивающу, мы ясно зрим, взирающе на честныя мощи твоя, поклоняющесе им в светлый праздник твой, усердно благодарим Господа за таковую милость Сибирскому краю и всему нашему отечеству. Ты же, Великий Сибирский Чудотворче, прими от нас недостойных похвалы сия и испроси нам у Господа сил твоему житию подражати и от всего сердца воспевати нашему Спасителю небесную песнь: Аллилуиа.

### **Икос 12**

Поюще твое светлое житие, святительския труды твоя воспоминающе, радуемся, яко Господь Бог в наше утешение сохрани тело твое нетленным и даром чудес тебе обогати, и молим тя, святителю и всея Сибири чудотворче Иоанне, испроси у Господа нам грешным желание и силы Его спасительные заповеди исполняти, да прославляем и мы своею жизнью имя Отца нашего Небеснаго, Тебе же, теплаго молитвенника нашего, восхваляти тако да будем:

Радуйся, яко честными твоими мощами в

Соборном храме града Тобольска почиваеши.  
Радуйся, яко от святых твоих мощей обильно  
исцеления подаваяй.

Радуйся, врачу безмездный, целебниче  
благосострадательный.

Радуйся, яко от многообразных недугов  
исцеляяй.

Радуйся, в сонных видениях немощным  
являяйся.

Радуйся, града Тобольска и всея Сибири  
утверждение.

Радуйся, богохранимому отечеству нашему  
великий молитвенниче.

Радуйся, мира христианского благодатный  
подвижниче.

Радуйся, Иоанне, святителю и всея Сибири  
чудотворче.

### **Кондак 13**

О великий всея Сибири чудотворче, святителю  
Тобольский Иоанне! Приими сие похвальное  
пение от нас, любящих тя, недостойных раб  
твоих и испроси нам от Господа и Спасителя  
нашего благодатной помощи в нашем со  
страстьми и похотьми борении, да обновляеми  
чистым покаянием, обрящем добрую  
христианскую кончину и ответ добрый дадим на  
Страшном судици Христовом и во веки с тобою  
и всеми Святыми воспевати будем Творцу и

промыслителю нашему, Триединому Богу,  
вечную радостную песнь: Аллилуиа.  
Сей Кондак чти трижды.



**ПОЛНЫЙ  
АКАФИСТНИК  
КАНОНИЧЕСКИЙ**

**АКАФИСТЫ  
КО ГОСПОДУ БОГУ  
ПРЕСВЯТОЙ  
БОГОРОДИЦЕ  
АРХАНГЕЛАМ  
И АНГЕЛАМ**

**І**

**ИЗДАНИЕ  
\* 1986 \***